

НА ХВАЛИТЕХ, ГЛАС 8. Подобен: «О преславнаго чудесе!»

- 1. Стих:** Хвалите Его на силах Его,/ хвалите Его по множеству величества Его.
- 2. Стих:** Хвалите Его во гласе трубнем,/ хвалите Его во псалтири и гуслех.

О прерадостная повести:/ Бога молит отрок Иоанн:/ Божия просит милости,/ еже просветити ему смысл,/ ниц простерся пред иконою,/ скорбь души пред Богом исповедуя,/ И се пелена от очию ума отроча снимается,/ и Светом Христовым отрок озаряется,/ да велия сотворит и многия научит.

- 3. Стих:** Хвалите Его в тимпане и лице,/ хвалите Его во струнах и органе.

О чудес преизобилие!/ О Любве живое облистание!/ Кто не поведится твоему благотворению/ и еже к убогим милосердию;/ Славному Ликийских Мир святителю/ неисчетностию чудес подобился еси./ Темже грады и веси земли русския,/ Иоанне праведне,/ видеша тобою Свет Христов.

- 4. Стих:** Хвалите Его в кимвалех доброгласных, хвалите Его в кимвалех восклицаня./ Всякое дыхание да хвалит Господа.

Якоже свет и теплота/ солнцу неразлучни,/ тако к тебе святость и учительство,/ любы и милосердие присущи быша, Иоанне священнейший,/ людем благодарственне./ Темже, о пастырю, буди согревая и просвещая нас, буди, якоже солнце душам нашим.

Слава, Глас 7:

Покланяяся святым иконам,/ славлю Христа Бога воплощенна,/ образ Славы Отчия./ Исповедую Отца, безначально Сына родившаго./ Прославляю богоподобие человеков,/ иже храмы Святаго Духа суть./ Зря же Креста образ, в чувстве имам/ силу Креста Животворящаго:/ се есть богословие твое,/ отче святыи имже великим учителем Церкви уподобился еси, // образы иконописнии во славу первообразных почитая.

И ныне: Богородичен: глас тойже:

**Родился еси от Девы несказанно, Христе,/ и просветил еси
сущыя во тьме,// вопиющия: Гóсподи, сла́ва Тебе.**

Или Предпразнства, глас 2. Подобен: «Доме Евфрафов»:

**Приидите, земнорóднии,/ согласно Деву Богородицу Мари́ю/
Воспоём непреста́нно,// из Неяже Христос рождается.**

Славословие великое:

**Слава в вышних Бо́гу,/ и на земли ми́р,/ в человецех благово-
ле́ние./ Хва́лим Тя, благослови́м Тя,/ кла́няем Ти ся, славословим
Тя, благодарим Тя,/ вели́кия ради славы Твоея́./ Гóсподи Царю
Небесный, Боже Отче Вседержителю,/ Гóсподи, Сыне Едино-
родный, Иисусе Христе, и Святы́й Ду́ше./ Гóсподи Боже, Агнче
Божий, Сыне Отець,/ вземляй грех мира, помилуй нас;/ вземляй
грехи мира, прими молитву нашу;/ сядя́й одесную Отца, поми-
луй нас./ Яко Ты еси един Свят,/ Ты еси един Господь, Иисус
Христос, в славу Бога Отца. Аминь./**

**На всяк день благословлю Тя, и восхваляю Имя Твое во веки, и в
век века./**

**Сподоби, Гóсподи, в день сей без греха сохраниться нам./ Благо-
словен еси, Господи, Боже отец наших, и хвально и прославлено
Имя Твое во веки. Аминь./**

Буди, Господи, милость Твоя на нас, якоже уповахом на Тя./

**Благословен еси, Господи, научи мя оправданием Твоим./ Три-
жды.**

**Господи, прибежище был еси нам в род и род./ Аз рех: Господи,
помилуй мя, исцели душу мою, яко согреших Тебе./ Господи, к
Тебе прибегах, научи мя творити волю Твою, яко Ты еси Бог
мой:/ яко у Тебе источник живота,/ во свете Твоём узрим свет.//
Пробави милость Твою ведущим Тя.**

Святы́й Бо́же, Святы́й Крепкий, Святы́й Безсмертный, помилуй нас. Трижды.

Слава Отцу и Сыну и Святому Духу и ныне и присно и во веки веков. Аминь.

Святы́й Безсмертный, помилуй нас.

Святы́й Бо́же, Святы́й Крепкий, Святы́й Безсмертный, помилуй нас.

ТРОПАРЬ, ГЛАС 4:

Со апостолы изыде вещание твое в концы вселенныя, / с исповедники страдания за Христа претерпел еси, / святителем уподобился еси слова проповеданием, / с преподобными во благодати Божией просиял еси. / Сего ради вознесе Господь бездну смирения твоего превыше небес, / и дарова нам имя твое во источник предивных чудес. / Темже во Христе во веки живый, чудотворче, / любовью милуй сущия в бедах, слыши чада твоя, / верою тя призывающия, / Иоанне Праведне, // возлюбленный пастырю наш.

СЛАВА И НЫНЕ: БОГОРОДИЧЕН, ГЛАС ТОЙЖЕ:

Еже от века утаенное, / и ангелом несведомое таинство / Тобою Богородице, сущим на земли явися, Бог / в неслитном соединении воплощаемь, / и крест волею нас ради восприим, / имже воскресив Первозданного, // спасе от смерти души наша.

НА ЛИТУРГИИ

**Блаженна от канона Святаго, песнь 3 и 6. Аще 20 дек.: Пред-
празднества песнь 3 и святаго иоанна песнь 6.**

ТРОПАРЬ, ГЛАС 4:

Со апостолы изыде вещание твое в концы вселенных,/ с исповедники страдания за Христа претерпел еси,/ святителем уподобился еси слова проповеданием,/ с преподобными во благодати Божией просиял еси./ Сего ради вознесе Господь бездну смирения твоего превыше небес,/ и дарова нам имя твое во источник предивных чудес./ Темже во Христе во веки живый, чудотворче,/ любовьию милуй сущия в бедах, слыши чада твоя,/ верую тя призывающия,/ Иоанне Праведне, // возлюбленный пастырю наш.

КОНДАК, ГЛАС 4:

От младенчества Богом избранный,/ и во отрочестве дар учения чудесно от Него приемый,/ и к пресвитерству в сонном видении преславне призван быв,/ пастырь дивый Церкви Христовы явился еси, отче Иоанне,/ благодати тезоимените./ Моли Христа Бога // всем нам с тобою в Царствии Божием быти.

Прокимен, глас 7: Возвеселится праведник о Господе и уповает на Него.

Стих: Услыши, Боже, глас мой, вегда молитися к Тебе.

Соборного послания Иоаннова чтение (Зач. 73)

Аллилуия, глас 4: Готово сердце его уповати на Господа.

Стих: Благ муж щедра и дая.

От Луки Святаго евангелия чтение (зач.26).

Причастен: В память вечную будет праведник, от слуха зла не убоится.

На отпуске поминаем святого праведного отца нашего Иоанна, Кронштадского чудотворца.

Устав о празднице святого праведного Иоанна Кронштадского.

Память святого праведного Иоанна Кронштадтского совершается 19 октября, егда и память небеснаго его покровителя, преподобнаго Иоанна Рыльского, и 20 декабря в день его преставления.

19 октября совершаем память его соединяя службу его со службою святого пророка Иоиля, егоже преемник по духу в российской земли бысть святой праведный Иоанн или со службою преподобнаго Иоанна Рыльского, или же творим бдение единому праведному Иоанну (что в Русской Церкви прилично есть).

На Господи воззвах: поем стихиры пророка 3 и Иоанна Кронштадтскаго 3 (или едину Иоанну на 8), на литии и стиховне стихиры праведному. Тропарь праведнаго Иоанна, аще бдение, 2-жды и Богородице Дево единойды, аще несть бдения Слава и ныне: Еже от века утаенное:

На утрени Тропарь дважды, Слава и ныне: Еже от века утаенное: седальны праведнаго, Слава и ныне: Богородичен. Канон Богородицы параклисис и святого (или святых). Катавасия: Отверзу уста моя: светилен праведнаго, Слава и ныне: Богородичен. Хвалитны на 4, Слава: праведнаго, И ныне: Богородичен. Славословие великое.

19 Декабря соединяем службу св. прав. Иоанна со службою предпразднества рожества Христова и (аще храм или праздник его творится) свщмч. Игнатия Богоносца, на негоже Христос указав рече: Аще не будете, яко отроча оне не внидете в Царствие Небесное. На Господи воззвах: стихиры на 10: предпразднества 3, свщмч. Игнатия 3, првд. Иоанна 4. Чтение св. првд. Иоанна. На литии: св. Иоанна. Стиховны: св. првд. Иоанна, Слава: Игнатия, И ныне: Предпразднества. На благословении хлебов: првд. дважды, предпразднества единойды.

На утрени Тропарь Предпразднества, Игнатия, Слава: првд. И ныне: Предпразднества. Канон предпразднества, Игнатия и Иоанна. Катавасия: Христос раждается: Светильны: Игнатия, Иоанна и предпразднества. Хвалитны: предпразднества 4, Иоанна 4, Слава: Игнатия, И ныне: предпразднества. Славословие великое. Тропарь св. првд. Иоанна, Слава, И ныне: предпразднества.

На литургии блаженна предпраздн. песнь 3, првд. песнь 6.

20 декабря, аще неделя, или аще изволит настоятель, совершается служба токмо предпразднества и св. првд. Иоанна со службою воскресною по главе службы св. Петра митрополита 21 декабря. Служба же свщмч. Игнатия совершается со службою св. мч. Вонифатия 19 декабря.

Такожде 19 окт. может совершиться служба токмо св. првд. Иоанна по главе св. ап. Иоанна Богослова 26 септ., якоже и память прп. Сергия Радонежского 25 септ. совершается, а святых иных пяти службы, егда настоятель изволит. Обаче аще храм есть прп. Иоанна Рыльского, не должно службу его оставлять или на иной день преносити, но обоим святым, яко духовно единым пяти службы должно есть.